

Luaskan habitat untuk elak kepupusan gajah

SUATU ketika dahulu, peristiwa terserempak dengan gajah berkeliaran di dalam hutan di negara ini bukanlah sesuatu yang asing.

Malah, panorama haiwan gergasi itu melintas jalan secara berkumpulan di sekitar Gerik, Perak sudah menjadi kebiasaan kepada para pengguna jalan raya.

Bagaimanapun, sejak kebelakangan ini, situasi berkenaan sudah jarang berlaku meskipun di dalam hutan besar.

Laporan Jabatan Perlindungan Hidupan Liar dan Taman Negara menunjukkan populasi gajah liar di Semenanjung Malaysia adalah sekitar 1,220 hingga 1,450 ekor.



**MOHAMED
ZAKARIA**

Taburan gajah di Semenanjung Malaysia tertumpu di Pahang, Terengganu, Kelantan, Kedah, Perak, Johor dan Negeri Sembilan.

Populasi gajah paling tinggi adalah di Taman Negara, Pahang dengan anggaran 290 hingga 631 ekor.

**Dekan Fakulti
Perhutanan, Universiti
Putra Malaysia, Prof.
Dr. Mohamed Zakaria**

Hussin berkata, salah satu faktor populasi gajah berkurangan adalah disebabkan habitatnya yang kian mengecil.

Katanya, aktiviti penebangan hutan secara berleluasa untuk pertanian dan pembangunan

menyebabkan gajah sukar hidup.

“Gajah memainkan peranan penting dari segi keseimbangan ekosistem dan lambang ke arah konservasi biodiversiti negara.

“Kesedaran dan kerjasama seluruh masyarakat amat penting untuk melindungi dan mengekalkan khazanah negara ini,” katanya ketika dihubungi *Kosmo!* baru-baru ini.

Hari Gajah Sedunia disambut pada 12 Ogos setiap tahun bermula sejak tahun 2011 bagi mendedahkan masyarakat dunia mengenai usaha-usaha pemuliharaan spesies gajah.

Menurut Mohamed Zakaria, salah satu langkah yang telah diambil oleh kerajaan untuk memastikan gajah tidak pupus ialah dengan menyambungkan habitat terpencil

dengan hutan besar.

Jelasnya, langkah tersebut dapat menambah habitat semula jadi selain mengelakkan aktiviti mengawan sesama famili.

“Kerajaan perlu memperbanyakkan Program Central Forest Spine (CFS) bagi menyambung hutan terpencil dengan hutan yang lebih besar.

“Buat masa ini, program CFS pertama telah dilaksanakan di Gerik. Program ini lihat sangat berjaya,” katanya.

Selain kerajaan yang menjalankan program kesedaran dalam kalangan masyarakat, pihak swasta dialu-alukan untuk bersama-sama menjayakan program tanggungjawab sosial korporat seumpamanya.